

Mbanjraiqhau:

Guh Nungzgyahloz Lijyouz Ndae Baenzfouq

濠浩新村发展农家乐旅游脱贫致富

□ Aiswh Dungbyungj iogj

Daj giz gyae yawj aenmbanj moqsag gyaeunde.



▲ Honghmbanj cinghseuq.



▲ Hekyouz vad bez baeuh raemx guh' angq.



▲ Vunzmbanj ngoenzciet guh doxdax hozdung.



▲ Lwgnyez ndaw mbanj angqyangz raeuh.

Mbanjraiqhau dieg youq laj fai guekgya 4A gaep gingjih Cwngz-bizhuz, gij bya、rin、raemx、faexcuk、ndoengfaex youq raemxdah cienbak bi cungdongj gatvej lajde, yienj ndaej gyaeunde yinxvunz. Daj bi 1995 324 roenguek gaij guh gya-gvangq le, Mbanjraiqhau caeuq singz Baksak couh bienq gyawj ngamq miz 6 goengleix gyae, ndaej daj aen mbanj ndaw runghbya gyae' gyangq ndeu bienqbaenz rogsingz Baksak, caiqlij miz cigoenggyau cigsoh doeng daengz ndaw mbanj, doidoengh hong lijyouz aenmbanj hwngfat.

Mbanjraiqhau dwg aen mbanj Nanzloz Cunh Yungjloz Yangh Yougyangh Gih Baksak Si. "Raiqhau" dwg Vahcuengh, eiqsei dwg gij yiengh gingj gyaeunde raemxlangh

hau raemxdah laegit daembongj ndaekrin gyang dah le sinz sanq baenz haenx. Byaij daengz bakmbanj, couh raen miz diuz giuzndojfwn guh ndaej gyaqciq ndei yawj ndeu vang gvaq gwnz daj doeng haeuj ndaw mbanj, henz giuz faexcuk heuswd ngauznged, reihgyoij baenz benq mwnkup homftw; ndwn youq gwnz giuz, caenh raen gij raemxdah sawyau menhmenh lae gvaqbae, henz dah guh miz aendiengz roqluengq, diuz roenbenjrin ngutngeuj iet coh song mbiengj, gag miz cingzdiuh de; byaij haeuj ndaw mbanj, couh raen baenz aen baenz aen ranzlaeuz moqsag gyaeunde daengibaij youq song henz roen, diuz roen suiinjz gvangq youh bingz ndeu con gvaq gyang mbanj, saek seiz ndaej raen miz geij ranz

vunz loengh bya daih hek, fungh ranzdajcawj henz roen cingq miz geij boux saimbwk nyaengq haeuj nyaengq ok, baihneix cingq youh at youh yaenj youq henz cauq guh daeuhfouh; baihhaenx cix aeucq dinmou naengj nohgouyuz dumq gaeqdoj, raq rumz ndeu ci daeuj, feih hom biu doh daengx mbanj.

Mbanjraiqhau bi 2006 nienzdae ndaej Baksak Si dingh guh si、gih song gaep diemjguhyiengh hwnjguh lajmbanj moq. Ciuq gij diegyouq、yienghgingj caeuq canjyez hwngfat saedcaeq cingzgvang, baez hainduj guh couh dingh baenz guh aen mbanj moq seveicujyi ndaej lijyouz yawj-gingj、youqndwi youzangq cungj miz ndeu. Ginggvaq roengzrengz guh, aenmbanj guhbaenz le dieg vunz-mbanj comzyouq、dieg epbya、dieg-ringgangq、dieg youzangq、dieg gingj ndoengfaex、dieg suenmak mbaetsou 6 yiengh neix, lij boiqdauq guhbaenz le giuzndojfwn doenghgiy lijyouz sezsiy neix, hawj mbanj moq demlai gij yiengh gingjih. Daj bi 2008 nienzdae ndaw mbanj demlai banh nungzgyahloz lijyouz gvaqdaeuj, haujlai hekyouz bae Cwngzbizhuz youzcet roengzma le, lij haeuj ndaw mbanj bae yawj gingj cimz gijgwn feih haenx, hix caemh haenh mbouj dingz. Bouxcoz 28 bi ndaw mbanj Liengz Fanz, youq bakranz bonjfaenh hai aen dan ringgangq ndeu, moix bi cinghsouhaeuj 10 fanh maenz doxhwnj. Daengx mbanj 119 ranz 440 lai vunz, daj guh nungzgyahloz lijyouz le souhaeuj bi beij bi lai, bi 2015 couh ciepdaih hekyouz 10 fanh vunzbaez, gyongjyoeb souhaeuj 500 lai fanh maenz, moix vunz bingzyaenz souhaeuj 1.5 fanh maenz.

Ginggvaq roengzrengz guh lai bi, seizneix Mbanjraiqhau gaenq daj aen mbanj gungzndoq ndeu hwngfat baenz gizdieg gyaeunde yinxvunz ndaej hawj hekyouz daejniemh saed-ceij lajmbanj、gamjsouh fungcingz lajmbanj、cimz byaekhaeux lajmbanj、sup heiq fulizswj ndeu. Bi 2007, ndaej bingz guh Guengjsae maenh-ndei singzmbanj gveihva sezgi bingzbeij cunhcin gveihva loih it daengj ciengj, bi 2009 aeundaej aen cwnghauh "Guengjsae aen mbanj cib daih rengz hoengh".



▲ Ndaw mbanj miz nungzgyahloh caeuq ranzhekninz.



▲ Giuzndojfwn bak mbanj caen ndei yawj.



▲ Vunzmbanj guh hong dauqma.